

Thursday, August 21, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

GRASSROOT SPORTS DEVELOPMENT

Sports Minister Pu Lalnghinglova Hmar in kum 2036-a India in Olympics thlen a tumah Mizo infiammi an tel ve theih nan Grassroots Sport Development Programme chu tih tak zeta kalpui a tul tih a sawi.

Vawiina Ramhlun Indoor Stadium Conference Hall-a, Grassroots Sport Development Programme a hmanpuinaah, Sports Minister Pu Lalnghinglova Hmar chuan naupang infiammite kaihruaia, zirtirtu tur coach kalkhawm te chu inthunun a, hun vawng dik tura chahin, an naupang kaihhruai te tana entawn tlaka awm tur leh mahni khaw naupangte chawikang a, hmasawna tha zawk an neih theih nan GSDP chu kalpui turin a fuih a, infiamna chu tih takzeta kalpui a tul tih sawiin training thulh mai mai lo turin a chah a, GSDP chuan naupangteah danglamna a thlen ngei tur a ni tih sawiin sum sen thlawn a nih tawh loh nan tih dan ngai reng a kal chuan rahchhuah ngai reng an neih thin avangin GSDP chu a danglamin an kalpui dawn a ti a, India in kum 2036-a Olympics thlen a tumah Mizoram pawh tel tir ve ngei an duh a, ram pum huap leh khawvel huap inelnaah te tel ve thei tur chuan a bulthut atanga inbuatsaih tan a ngai a ti a, chuvang chuan Grassroots Sport Development Programme chuan rah tha zawk a neih theih nan leh sang zawka kalpui a nih theih nan School Education Departent atangin Mizoram States Sports Council hnenah hlanhhawn a ni tih a sawi.

Byte: Sports Minister Pu Lalnghinglova Hmar

Grassroots Sport Development Programme (GSDP) hi Samaghra Mizoram hmalakna hnuaiah Mizoram States Sports Council nen thawk hova kalpui a ni a, he hmalakna hnuaiah hian Mizorama district hrang hrangah centre 46 hawn niin, sports dicipline pakua kalpui a ni dawn a, he programme in a tum ber chu Mizoram atanga infiammi a tam thei ang ber chu khawvel huap inelnaah te India aiawha chhuak thei tura chher chhuah a ni.

National hockey player leh National umpire ni lai, K.Ngaihpari chuan GSDP kal dan chu naupang tan a tha hle a ti a, Hockey bikah phei chuan bul tanna atan duhthusam nia a hriat thu sawiin, zirna changtlung zawkah te zir chhovin national leh international level tournament thlengin an khel theih phah thin a, GSDP chuan naupang talent nei tha tak tak, an theihna pho chhuahna tur hun nei remchang lote zawnchhuah chu a tum ber a nih thu a sawi a ni.



ONLINE GAMING BILL

Lok Sabha thutkhawma pass tak Online Gaming Bill chu sawrkarin infiamna pakhat zingah a chhiar tel tawh dawn.

The Promotion and Regulation of Online Gaming Bill 2025 hi nimin khan Information and Broadcasting Minister Ashwini Vaishnaw chuan Lok Sabha ah a pu lut a, Online Gaming chu thalaite tana hmasawnna tur zawk leh changkang zawka siam ani tih sawiin sum inthapna leh diklo taka lak an khap thung a, hremna na tak a awm tawh dawn a ni.

Mizorama Social Activist Pu Lalhriatrenga Chhangte chuan Sawrkar laipuiin Online Gaming Bill a rawn chhawpchuak chu thalaite tana hmasawnna thar thlen tu ani a ti a, Online Gaming kaltlangin thalaiten hlawkna tha zawk leh dik taka sum an lakluh theih nan sawrkarin dan mumal tak a siam a, pawisa khelhna anga diklo taka sum lakluh an tum nasat thin avangin chhungkaw tam tak leh thalai nun tam tak a chhiat phah a, hei hi sawrkar chuan ti tawpin mumal zawkin a kalpui tawh dawn tih a sawi.



MPYCC

Congress thalai chuan Chief Minister Pu Lalduhoma chu Mizo mipuite hnenah thudiklo sawi a chin bansan turin an phut thu an sawi.

Wawiina Aizawl Press Club a thuthar thehdarhtute an kawmnaah, MPYCC Sr. vice President Pu Ngurdingliana Pachuau chuan tunhnaia CM Pu Lalduhoma'n a facebook ah Mizo thalai 300 Border Security Force (BSF) a lakna tur chu Union Home Minister Pu Amit Shah hnena a dil chhuah anga a sawi chu thudiklo hulhual a ni tih sawiin, Chief Minister chu dawt sawi sim turin a duh thu a sawi a, Social Media kaltlanga a thu post dangah India Sipai Agniveer lakna kalpui mek chu MLA Lt. Col Clement Lalhmingthanga'n a vil reng bakah, Sports Minister Pu Lalnghinglova Hmar thahnemngaihna zarah Sport Quota atangin mi 12 an tlin thu a tarlan pawh Politics tenawm tak a ni tih sawiin, hna lak chungchang tihbawrbanna leh mipui rilru hruai sual tumnaah an ngai tih an sawi a. India Sipai, BSF leh a dang te laknaah state sawrkar Minister ten tih theih an neilo tih sawiin, thudiklo leh athlak tak hmanga Mizo mipui bum tawh lo turin Chief Minister an chah tih an sawi a ni.



AGRICULTURE MINISTER

Agriculture Minister Pu PC Vanlalruata'n nimin khan Assam Agriculture University, Jorhat-ah ni hnih awh tur “National Conclave on Cocoa, 2025” hawwna hun khuallian niin a hmanpui.

Agriculture Minister chuan India ramina chocolate siamna atana Cocoa a mamawh zat chu metric ton nuai 1,20,000 a nih lain, tun dinhmunna India ramina tharchhuah chu metric ton 22,000 chauh a ni a, India ramina mamawh 80% chu ram dang atanga lakluh a nih avangin sorkar laipui pawhin Cocoa plantation zau zawka kalpui a nih theihna turin hma a la chho mek tih a sawi. Cocoa chu Chocolate siamna atan mai bakah, damdawi siamna industry lamah te, cosmetic siamnaah te leh chhang siamna lamah te thlengin a tangkai hle tih a sawi baw.

Pu PC Vanlalruata chuan Mizoram sorkar-in National Mission on Edible Oils hnuaiah Oil Palm cultivation a kalpui mek thu sawiin, NMEO – Oilseeds hnuaiah Tung cultivation pawh nasa lehzuala kalpui tum a nih thu a sawi a, Kuthnathawktute'n hlawkna an tel tam lehzual theihnan inter-cropping kalpui tum a

nih thu leh, he’ng Oil Palm leh Tung cultivation karah hian inter-cropping tur atan Cocoa chin hi a that hle dawn thu a sawi bawk.



LAWNGTLAI WEST MLA

Lawngtlai West bialtu MLA Pu C. Ngunlianchunga'n MLA Fund in Lawngtlai khawpui chhunga kawng pawimawh, leiminin a tihchhiat a siam dawn.

Kumin May 30 zana Lawngtlai Chandmary leh Bazar Veng a In pasarih chim vanga, National Highway atanga DC, Office, District Hospital leh Sorkar hmun pawimawh thahnem tak panna kawng ping chu Auto Rickshaw kaltheih in siam a ni a, helai kawng pawimawh tak hi Lawngtlai West MLA chuan Lirthei lian zawk ten an zawh theih nan MLA Fund hmangin siam a tum a, leiminna lai hi Lawngtlai West huam chhung nilo mahse, Lawngtlai West MLA chuan mipui lamin harsatna an tawh phah nasat avang leh rikrum thil leh damlo mangang zual tan harsatna lian zawk thlen belh zel thei a nih vangin, a MLA Fund hmanga siam a tum thu a sawi.

